

摘藻堂四庫全書薈要

集部

欽定四庫全書薈要

集部

元詩選初集卷六十五



詳校官候選知縣臣吳甸華

欽定四庫全書薈要卷二萬四百二十五

集部

元詩選初集卷六十五 長洲 顧嗣立 編

馬臻霞外集

臻字志道別號虛中少慕陶貞白之為人著道士服隱於西湖之濱大德中嗣天師張與材至燕京

行內醮名流竝集虛中在焉未幾辭歸手畫桑乾龍門二圖傳于世嘗從褚雪巖遊肆力吟咏所著曰霞外集淮陰龔聖予謂其古今體制具在而馴

雅如其人同里仇仁近亦曰遠覽崧岱之雄拔江
河濟淮之奔放近挹兩峰三潭六橋之佳麗秀整
交廣視闊胸次宏豁宜其筆力不凡如此當是時
江南甫定兵革偃息遺民故老如周草憲汪水雲
之徒徃徃託於黃冠以晦迹虛中殆其流亞歟廬
山黃石翁摘其秀句謂如達人不患貧貞女不事
媚靜知春事佳老覺世味熟某丘有樹猶堪宿何
處無魚可療飢瘦梅喜浸古罌盎老態怕著新衣

裳後世視此以為何如人至云苦心雕琢易出口
渾成難道合天心易篇終鬼膽寒非深於詩者不
能道也

春霽書懷

紛雨洗遊塵潤物亦已足淑氣浮芳鮮山澤一時綠回
鴈遠零亂流雲高斷續伊余愜所向遇景相穆穆好鳥
如含情不語立嘉木靜知春事佳老覺世味熟遂展平
生情誰復辨蕉鹿

五雲山寫望

少乏超絕姿，瘦鶴存野格。乾坤心自放，頗覺塵土窄。安得千金索，使我窮地脈。征途多荆榛，此志寧復得。今晨躋山顛，納納瞰廣陌。正東臨大江，髣髴海外國。孤帆揚長風，靜入秋氣白。層巒引列嶂，下有雲霧隔。不知誰家樓，突兀立遠色。禹穴指顧外，厯厯禾黍黑。簸蕩千古愁，人世一過客。高歌據苔石，坐見日車仄。目極窮冥搜，一鴈長空沒。

遣興

長日閉門坐軒車誰與親
鶯花欺白首鮭菜足青春
今古斯文在江湖舊業貧
丹心不可道風雨夜來頻

竹窻

竹窻西日晚來明
桂子香中鶴夢清
侍立小童閒不動
蕭蕭石鼎煮茶聲

題墨竹

拂雲標格歲寒心
墨色分陰重又輕
不似渭川千畝綠

只和風雨作秋聲

偶成

昔嫌上界多官府不道人間足是非
四十年來悲喜夢倚闌閒看柳花飛

春日幽居

淺淺春風尚帶寒日斜香篆半燒殘
杏花一樹開如錦怕觸嘯鴛不倚闌

湖中春遊曲

堂堂復堂堂畫鷁誰家郎繡旌鴛頸冷膳府鷺刀光傾
椒注桂邀流芳楚腰絡索聞懸璫篴篥急響如相惱岸
頭折盡忘憂草黃金慣積自媒身隨肩滿席惟嗔老牙
籤萬軸齒不拈孟客何賓跡如埽柳絲撲撲乘風吹花
翎小鳥唬訴誰玉郎沈醉晚未醒春光去矣猶不知

危坐

危坐不覺久月照一庭綠三更白露下夜氣溼野服恬
淡失悲喜視聽非耳目閒將黃庭經更趁月下讀

越中言懷

分甘茅屋老蒼苔不是明時棄不才
避社燕歸楊柳合趁虛人散鷺鷥來
半江落日明漁浦兩岸回潮掠釣臺
吳越爭雄俱一夢年年杜若滿汀開

初春即事

東風又到武林城靜裏看春各有情
怕說利名多晝睡愛尋山水每閒行
傍人冷笑營巢燕求友翻憐出谷鶯
世事不窮時易失翠微深處夕陽明

二禽篇二首

杜鵑杜鵑聞爾曾為蜀天子一自城荒爾身死當年御
極日萬幾何苦今朝自如此恭聞太上垂玄言治大國
分烹小鮮流情縱逸不追悔無端却恨春山煙毛衣藍
縷滿身黑萬里岷我歸不得六合茫茫啼一聲春風為
爾無顏色

鷓鴣鷓鴣不知春色何負汝每到春來聲更苦百年不
得此身安尚憶當時在行旅爾不學大鵬一舉培風兩

翼如雲垂又不學籬邊
斥鴳翱翔飛躍蓬蒿枝
黃陵廟前幾春草空遺
怨恨傳新詩江南二月
煙花亂子子孫孫自呼
喚說盡人間行路難淒
風苦雨心腸斷

貴公子

麝沈灰暖瑞煙輕十二
闌干轉畫屏翠袖閒調
鸚鵡語牙牌分榜牡丹
名半垂簾幕因春冷未
放笙歌為宿醒颭颭流
蘇風不定隔牆時送賣
花聲

雪

冷逼街頭酒價高
晚來風急更蕭騷
青樓醉舞不歸去
江上一蓑憐汝曹

吳江夜泊

不見天隨子
令人逸興孤
邨砧聲自荅
岸鳥語相呼
河漢回西極
星辰入太湖
古情吟不盡
明月照姑蘇

宮怨

多愁多怨怕春天
花外時聞警蹕傳
金縷繡衣渾不稱
餘香猶帶御鑪煙

釋宮怨

萬頃恩波一寸心
玉階青草斷車聲
文章近日無人愛
休把黃金乞長卿

張野泉偕虛谷方使君趙春洲數先輩見訪即
席賦詩各以酒字為韻

幽居局青春
水軒僅如斗
敲門問誰來
過我得良友
浮雲無停陰
霽色破古柳
人生不自適
歲月欺老醜
欲挽湖水春
添我盃中酒
酒盡意不盡
落日照魚笏
掀髯出

門去悲歡一何有

送郭似山回張公洞

春風吹沙春草長
雜花媚煙飛野香
幽花裊裊泣雨色
人間光景勞中腸
赤城老仙呼鶴起
迢迢直度太湖水
玉洞碧桃凝古芳
玄扃窈窕羅疏綺
吟詩贈別情相關
霧節風幢幾日還
歸來無語生幽寂
唳鵠一聲春晝閒

無事

無事每日不出戶
滿院松竹森交加
晝眠厭聽啄木鳥

早涼喜見牽牛花一真自可了生死萬事不必論等差
誰能屑屑管迎送客來且試山中茶

弔崔雲山

埃風蕩天荒孤山卧秋草君家孤山下不厭孤山好昔
我山中房識君師侍傍白髮映蕉水妙語回羲皇聞君
又絕粒默默宴華室道畢合神風回車朝帝一制魔誠
所難有身良可歎層陰翳太景平陸翻狂瀾憶君出門
去相看淚如雨始欣天道還逸駕倏飄舉有詩君莫吟

有酒君莫斟神交動恍惚尚想聞空音我歌山日落松
聲起寥廓魂兮其有知為我來冥漠幽室苦夜長思君
念春陽春陽難復見短歌不成章

述懷

家無負郭田何以懷歸耕豈不有他好復恐勞其生窮
居四十年富貴浮雲輕乳鳥喧高枝壯心忽然驚所憂
聞道晚德業將無成言此向知己欲語已忘情

春日寫望

遠山重疊限空明
淡拂生綃絕點塵
半舸夕陽喧酒客
一樓寒色倚詩人
早鴛懷舊隨時至
芳草無情著處新
却憶城中有貧者
杏花開盡不知春

山中寒食

青陽轉節候
雜芳麗原陞
山中寒食近
嘯鵲亦已急
新冢有人祭
古墓無人泣
傷心名利骨
瑟瑟土花溼
石馬悲無聲
空對東風立

春霽陪葛元白遊南山

積雨淹幽事初晴得此晨問舟尋上客放步約同人偶

入招提境如酬宿昔因禪心本無住吾道豈憂貧城郭
千年鶴林丘一聚塵歡娛時不偶激越意空陳路改疑
前夢雲孤憶老親彈琴僧舍晚覓句酒家春閒水文輕
縠平蕪展細茵目驚流節駛心醉古風淳久識窮非鬼
難言筆有神感深將下涕喜極欲忘身蹭蹬繁花老陰
沈亂葉新野夫元嬾放杜宇足酸辛更欲東蒙隱難期
北郭鄰有懷聊自適媿爾葛天民

田家

地偏生事僻轉覺入城遙犬吠三叉路人行獨木橋炊
煙時滅沒邨酒自招邀昨日蠶新浴柔柔綠滿條

寄越上友人

分袂沙邊兩歲餘生涯別後竟何如雲迷禹穴無來信
秋隔吳山有故居思斷碧天江漠漠吟低白日雨疎疎
郊墟昨夜新涼入珍重佳兒好讀書

中秋見月

去年中秋月團圓上林藪文士兩三人竟夕坐相守精
光浮白空誰見蝦蟇醜觴酌雜歌吟待得下高柳今年
中秋月輝輝入窻牖照我如有期怪我尊無酒月是去
年月不復去年友人生如風花聚散良不偶賢愚與貴
賤肉骨同一朽我今見明月再拜復稽首側聞古老言
此言豈虛有正秋三五滿萬里絕纖垢玉兔搗神藥服
之壽長久我無周生術安得月在手天梯邈難攀中局
欲成疚萬方浩漫漫月輪又西走

秋日即事

芙蓉涼淺未全紅
稚子攔街鬪草蟲
節物變遷風景在
故園心事不言中

前結交行

古交山上松青青
色不改縱有霜雪侵
節操固常在今
交陌上花容貌相矜誇
一朝風雨至飄泊隨泥沙
陳雷管鮑世不有一貧一富難長久
對面相看仰泰山下視羣峰皆培塿
嗟來乎嗟來乎牀頭黃金不可無
君看金

盡失顏色壯士灰心不丈夫

後結交行

古交皆結心其意能斷金今交皆結金倏忽能變心取
舍既殊軌反掌生陸沈正平一朝忤黃祖有若將身投
猛虎子桑莫逆忘其生乃能相與無相與古人今人皆
足悲百年憂樂須臾期男兒節義死不變誰肯心懷未
濟時嗚呼誰肯心懷未濟時

聞早鴈

初鴻有餘音老眼無遠光登樓望不極但見天青蒼朝
飛秋日短莫宿秋水長不知從此去早晚到衡陽衡陽
有故人書札不可將木末避矰繳雲邊足鷹揚中途多
苦辛羽翮能無傷望爾三春歸依舊到吳鄉

德清夜泊

遠色變昏晦卸帆依淺沙浪搜盤岸木風逆赴巢鴉細
草官塘直長煙野日斜寒機聞夜織燈火是誰家

擾擾

擾擾行塵應接勞
繇來斥鷃樂蓬蒿
胸中丘壑開圖畫
霞外光陰託酒醪
未必漢廷踈四皓
至今吳地事三高
功成便合謀身退
緱嶺春風正碧桃

春日閒居二首

滿院春陰半掩扉
杏花猶怕曉寒欺
蘚痕帶露侵棋石
山影分雲落硯池
貧久家僮生去意
社遲梁燕阻歸期
詩成一餉無人說
芳草連天寄與誰

數峰青處敞蕭齋
自斫楊枝傍水栽
問字無人攜酒去

消閒有客抱琴來
遙汀風急鷺雙起
古岸日斜花亂開
袞袞光陰堪一笑
城頭畫角為誰哀

海棠

殷紅含露臥朝寒
疑是春工畫未乾
底事詩人吟不穩
直須燒燭夜深看

烏夜啼

烏夜啼
朝啼東方白
夜啼林影黑
關河萬里天
雨霜月
冷夜長眠不得
烏夜啼
憐爾巢中黃口時
哺腥吞腐羽

毛長母子日日長追隨一旦離羣自成偶相呼相喚期
相守故雄零落不復知留得孤雌住衰柳柳條蕭颯難
棲身夢驚三月楊花春載飛載止情莫伸欲去不去愁
殺人不知挾彈誰家子暴物傷生苦如此哀音散入江
湖間老屋破窗燈欲死烏夜啼君豈知

春遊

園草浮青入杖藜莫教孤負好花時人生屈指頭如雪
消得春風幾首詩

送梁中砥歸句曲

家住華陽第幾峰，又將琴劍去悠悠。
地浮雲氣連山白，露浴丹光入夜紅。
千里音塵隨斷鴈，百年聚散類飛蓬。
吳頭楚尾關春恨，盡在鴛聲柳色中。

賣藥翁

山人本在山中住，偶向城中賣藥去。
不道石潭龍出雲，失却朝來下山處。

游仙詞

上清真人玉華仙夜策鸞輅凌珠煙罡風廣漠露華冷
搖蕩金鈴聞半天路逢仙姥騎白鹿侍女雙雙散香玉
遙看三島點神波恨入秋眉鏡中綠我自無為神自凝
萬竅不動心冥冥靈君期我謁太帝下視濁海魚龍腥
玉虛煒燁明玄景羽葆搖搖入空影一曲雲和奏未終
月輪已到崑崙頂

楊花

品題曾入百花名長恨濛濛畫不成灞岸雨餘粘穗溼

章臺風暖撲人輕，緩隨流水知無力。
閒度高樓似有情，想得山齋清影裡。
亂和蛛網惹柴荆。

蝶

曾隨秦女踏青陽，幾被鶯捎出建章。
芳草夢寒迷碧色，杏花雨細宿紅香。
粉凝薄翅春無力，恨入脩眉晚斷腸。
寄語莫尋歌舞處，五侯門第有高牆。

睡起

紅葵遶砌竹風涼，睡起呼童上午香。
一帶粉牆平似紙，

閒研水墨畫瀟湘

秋夜

眼空夜色秋滿城
城樓漏鼓聞四更
杓垂月轉萬山白
坐看天河西北傾

聞鴈

知汝幾時到先令
獨客聞雨昏低度
屋風急亂穿雲衡
岳路猶遠吳江夜
正分如何傳素札
為我弔湘君

野宿

野宿投邨舍，寒衣度石矸。
鄰雞喧莫柵，寒蟹上燈窻。
戍鼓凌雲擊，城鐘入夜撞。
蕭蕭楓葉下，鴈已過吳江。

題湘靈鼓瑟

沅湘水闊風蕭蕭，水風敲珮天光搖。
為彈寶瑟傳幽悵，一點柔紅瀉香露。
蒼梧恨鎖雲欲流，湘花背日烘春愁。
人間有夢到不得，仙山翠滑江浪黑。

雨久江邊餞別

別意千重酒暫停，放歌一曲向君聽。
家貧禮數多相失，

雨久支干盡不靈古巷聚人祠
標社莫潮催客散樟亭
孤帆又傍誰家宿遙見沙田
燐火青

見柳詠懷

畫船曾繫柳邊橋歌舞升平樂
意饒事去却憐橋畔柳
春來猶學舞兒腰

移蘭

幽蘭雜桃李開花無清香本具
巖壑姿庶得韜耿光誤
入芳園中乃覺氣不揚少年不
我顧志士徒見傷偶值

朝雨餘日吉復時良呼童斲春泥移根上高岡為爾去
蕭艾曉露滋滾滾永託松竹陰爾生豈不昌細葉舒冷
翠貞葩結青陽緩緩趨土脈慎勿近路傍路傍多轍迹
曲曲如羊腸恐爾遭采掇委質兒女將哀哉楚靈均細
佩荷為裳斯人不可見誰能復其常遂令薜蘿輩各自
爭芬芳回看桃李花零落空嘯妝

贈歌者

一聲河滿遏行雲恨逐飛花委路塵莫道尊前無淚下

聽歌不是舊時人

陪葛元白仇仁近訪南竺詩僧分韻得影字

花開空山春窮幽到絕頂入寺逢遠公頓覺塵慮屏遂
作蓮社遊把酒酌龍井萬生各有態得意還自領此樂
殊未極落日倒林影明朝下山去笑別風篁嶺

憶春

斷畦零落薺花明雨過平湖水漸生坐久忽思春去遠
綠陰濃淡隱啼鶯

栽孤松為九華山鍾道士作

九華何崔嵬融結本真宰神器之所鍾雲物足瀟灑挺
挺秦大夫獨立而不改既出衆木羣豈為艷陽待初疑
凍蛟掉禿尾忽若山靈張偃蓋又如元鶴歸來視城郭
悵別人間動千載楚南靈椿浪得名茫茫天壤知何在
流精貫浹骨欲飛風雨或致雷公怪林林紅紫索價高
幄錦圍春鬪光彩憐君令色不隨時空負才名成感慨
留向青山閱古今為問桑田幾滄海

吟雪

四山削玉水無波
冷坐孤吟意趣多
未必朱門知此味
紅鑪畫閣正笙歌

野步

野色畫難染
杖藜春水邊
新煙榆木火
遲日杏花天
邨酒傾壺濁
溪魚入膾鮮
人生行處樂
莫負杖頭錢

徐州寫望

并序

舟人云州有三百六十山
四時無草木樊噲墓凡

七處莫知孰是

三百六十徐州山骨立天風不受寒樊侯古冢七抔土
飛沙野蔓斜陽殘舟人指點向余說側望淹留寸心切
欲酹清尊弔古祠袞袞長河流不歇

新州道中

風沙渺渺客聯鑣時拂吟鞭慰寂寥車道綠緣酸棗樹
野田青蔓苦瓜苗杜陵老去家何在阮籍愁來氣不驕
自笑間人間未得得間終合隱漁樵

汶上即事

北關言別柳飛絲記得離家月又圓
華髮流年身半百黃塵足馬路三千
戍兵自裹餽糧送津吏遙迎傳驛眠
一夜南風吹汶水古榆深巷已聞蟬

灤都寓興

昨夜分明夢到家庭前開遍石榴花
龍門不放東風過五月平灤雪滿沙

為楊簡齋題空蒙圖

西湖天下奇回薄太古色春風散花柳元氣蕩空碧淡
然存天真豈為歌舞惑我家本住湖水邊筆牀茶竈依
漁船振衣一別五千里為君展卷心茫然欲問吾廬在
何處但見老木浮寒煙吾廬不可尋山川不可越人生
行止會有時長嘯階前望明月

金臺文廟石鼓

獵碣鐫功事惘然摩挲壞石卧寒煙昌黎已道文殘缺
又較昌黎五百年

久客

白露變榆柳滿城砧杵催故園經歲別遊子幾時回且
盡山公酒難將驛使梅秋聲不可聽永夜獨徘徊

客夜不寐偶成短句十首用渭北春天樹江東
日莫雲為韻

丈夫慎出處功成乃身退古人夫如何八十釣清渭
四時循化機萬物隨動息衆星紛熒熒天運齊拱北
縞素製野服誤染京華塵舊業在何處梅花江上春

男兒不得志壯心惜徂年長空起鵬鴉目送入寥天
布衾生淒寒夜夜夢歸去心恐秋風深摧殘紫荊樹
吟苦不成寐寒窗凝夜釭千古誰知心遙遙賈長江
此身如斷蓬飄蕭隨北風錢塘一望地家住西湖東
客慮千萬端長吁愁不出誰能事低眉揮盃送白日
幾欲膏吾車老眼不識路弟妹今何之蕭蕭齒髮莫
昨日家書至慰我久離羣遊子眼欲斷日日望白雲

旅興

客中白日送清尊燈下裁書眼漸昏南浦一年雲隔夢
西風萬里月當門酥凝瘦腕茶膏熟火慢筠籠楮被溫
未覺情懷殊冷落終身衣食是皇恩

早春聞笛

萬里南州客離家又一年春回首舊地笛怨鷓鴣天趁
日裁烏帽尋人賣馬羈歸心憂賦役負郭幸無田

回南

家在錢塘江上春京華投老獨漂零玉泉山外雪猶白

金水河邊柳又青
帽底流塵春冉冉
花間行李髮星星
分明記得經遊處
一路吟詩寫驛亭

途中寒食

行裝迢遞轉孤城
一路閒吟緩客程
潑火雨晴餚粥冷
落花風暖筍輿輕
感時已悟莊生夢
遺俗空懷介子情
只有嘯鵲解人意
平蕪漠漠兩三聲

吳中

故鄉別久語音訛
喜聽吳音入櫂歌
萬里歸來心未穩

夜闌猶夢過關河

西湖晚思

日落湖水黑衆山生遠塵船回載酒客樓倚獨吟人老
態多思舊時情只貴新籬邊古梅樹開謝幾年春

拜墓

一別松楸又一年歸來拜埽一茫然老鳥下竹窺盤飮
稚子攀松挂紙錢心斷野花春色裏愁生杜宇夕陽邊
東風不管流年事只向西湖送管絃

野外

野外蕭條景更佳
牧童將犢卧晴沙
白鷗長遶分魚市
紅杏深藏賣酒家
倦向客程添懊惱
老看春事厭紛譁
田翁也學青門隱
料理荒畦自種瓜

忽憶

忽憶行年五十五
擾擾得失枯人腸
金魚綠酒我須換
蒼狗白衣誰可量
瘦梅喜浸古罌盎
老態怕著新衣裳
親朋相別萬里外
一字不到三年強

謾成

暖催花雨溼行塵
脈脈憑軒欲損神
閒憶少年如昨日
只疑樂事是前身
黃鸝紫燕春仍好
剝水殘山物自新
可惜白鷗波浩蕩
扁舟老却釣魚人

傷廢冢

春風習習吹花木
千山萬山一齊綠
日午諸邨社鼓喧
田家小兒健如犢
閒來徒步上前岡
累累古塚相攢簇
荷鋤老叟向我言
元是前朝貴人族
貴人在時勢絕倫

後擁前遮來繡轂并吞鄰土孰敢嗔回山轉水開林麓
相連岡幹成一丘斲斷雲根埋寶玉大書功德紀豐碑
直向山前起華屋子孫擬作千年計畫是老夫親拭目
星移物換水東流泉下知誰伴幽獨翁仲雙雙賣與人
留得三竿兩竿竹寒食不見紙錢飛只有唳鵲替人哭
又說東家來卜地役夫日夜喧山谷天理蒼茫不可知
後車須看前車覆

述懷五十韻

昔際承平久生涯足可憐過庭猶昨日騎竹想當年書
劔辛勤歷輕肥少壯僂浪遊春富貴醉舞月嬋娟候轉
芳華歇時移斗柄偏狂歌傷德鳳再拜聽唬鵲敢議乾
綱墜難支國步顛安危誰可料否泰理相連義士含孤
憤謀臣誤大權少微潛在野太史泣占天不起嚴陵釣
空懷范蠡船乘軒猶寵鶴治國昧烹鮮朽木終摧折微
軀忍棄捐天兵威武奮皇澤至仁宣豈意波濤怙還容
骨肉全萬方蘇雨露四海戢戈鋌倦鳥思喬木窮魚守

故淵甌塵貧似范晝睡嬾如邊逸翮淹高翥羸驂恥後
鞭夢疑隍鹿在機息海鷗眠喪亂頭顱改蕭條節序遷
行將蝨測海坐待地流泉獻璞悲和泣辭金憶震賢世
途從汨汨王道本平平東魯衣冠盛中原禮樂專遠塵
山出沒大野輒盤旋砧響千門急蟾光幾度圓窺斑嗟
隱豹顧影笑飢鷗古水縈長帶晴雲擘亂絛弓亡元在
楚臺迴亦趨燕羽服陪瑤殿天廚錫綺筵域中知道大
物外愧身先歸意驚張詠離居老鄭虔風行猶有待歲

晚薄言還城郭人依舊湖山景自妍
艤舟臨斷港散策陟層巔
苑廢移山鬼祠荒謁水仙
壤梁殘白蟻舊物失青氈
落景連邨雨薰風一樹蟬
野茶伸雀舌林蕨豎兒拳
挂劍尋新塚懷人歎逝川
計疎生坎壈道直受屯蹇
穴冷拖腸鼠槎依縮項
鰯愁鴟休嚇食饒犬誤垂涎
業在詩三百沽從斗十千
舉觴欺大白隱几味重玄
淚盡山陽笛耕無杜曲田
苦吟期自放脫藁怕人傳
虎變愚難測龜藏我獨然
梅花開又落誰復繼殘編

雙鶴吟寄友人

依依兩白鶴歲久住青田一鶴垂兩翅飲啄沙汀煙一
鶴展長翮冥冥自沖天思之不可見獨立秋風前有時
月夜羣動息孤唳一聲山水碧凝眸側頸復裴回影落
空林風露溼故人獨抱經濟才淵珠炯炯光難埋江南
地暖梅花開折花待君君不來梅花歲歲開又落空向
梅邊詠雙鶴

鷺

水風吹冷逼菰蒲藕葉欹斜一半枯玉立鷺鷥渾不動
滿身煙雨看西湖

至節即事

并序

錄七

癸酉歲長至節效王建體偶成絕句十首余年始
二十即一時之事寓一時之意故淪落不復收今
於故篋中得其舊藁青燈三復如對故人樂天云
欲留年少待富貴富貴不來年少去乃知年少承
平之樂誠不易逢三十餘年恍一夢寐吁予老矣

滿簪華髮投迹空林情之所來不覺涕下故錄于
卷末以重感慨云

天街曉色瑞煙濃名紙相傳盡賀冬
繡幕家家渾不卷
呼盧笑語自從容

閒看來往坐多時雨灑香塵土涇微珠翠壓頭行不穩
嬌羞兒女把人衣

昨夜梅花已報春地瓶移插更精神
酒酣纖手爭來折
鸚鵡回頭不敢嗔

已有紗籠照舞兒
喧喧鼓笛自相隨
誰家院落來呼喚
門外天明也不知

簾旌疊疊繡鮫綃
遮護香風不放消
却恐酒闌先睡去
預教小玉問明朝

新詞聽徹思徘徊
侍女擎羹下箸遲
紅燭有花心暗喜
流蘇雙挂玉梅枝

店舍喧嘩徹夜開
熒煌燈火映樓臺
歡遊未曉不歸去
早有元宵氣象來

邨中書事二首

餉留兒女自喧呼
指點春禽又引雛
邨婦相逢還笑問
把蠶今歲是三姑

軋軋綠車草屋低
新篁帶籜出簷齊
鶯雛未省逢人避
直向路傍花上啼

春歸曲

平林靜綠生幽芳
桃脂杏粉攢蜂房
西樓浪客唱別恨
屈卮酒暖珊瑚光
百勞留春春不許
愁觴喃喃如寐語

翠鴉遊女卷香歸一夜花神老風雨

雜詠六言三首

堤晚遊人爭渡花密流鶯亂鳴近水亭臺柳色轉山樓
觀鐘聲

煙外幽人獨立落日正照平臺野鷺聯翩飛去山雲斷
續歸來

楚尾吳頭舊夢水邊山際閒情一夜杏園風急等閒吹
老鶯聲

聞蟬

短翼含風薄似秋一聲聲帶夕陽愁
年年古柳官塘路催得行人白盡頭

飛霜歌

飛霜悴百草芳蘭亦萎柯縱欲努舊力奈此寒風何在
昔結花初豈不受春多恥隨桃李場託迹空山阿四時
有代謝艷陽忽已過薰蕕苦不辨一體同消磨不如牡
丹根密幄相遮羅傷心復傷心傷此飛霜歌

旅夜

自慚身世拙客裏更闌情月樹回涼影秋聲疊夜砧道
能忘畏壘酒不破愁城睡薄吟魂冷西風亦屢驚

寄澈川楊如山

吾聞沙丘之馬黃驪牝壯世莫知九方皋去不復有天
風吹我滄海邊忽地相逢釣鼇手論文託契輸心胸傾
倒金尊斟綠酒登高望遠古意多百年之樂能幾何男
兒屑屑志不展秋霜滿鬢空蹉跎酒酣眼極情未畢笑

指青山歌落日却憐徐福向蓬丘
蒼蒼煙浪無消息明朝挂席我歸來
西湖十月梅花開梅花開動詩思思君
不待春鴈回因之一寄平安字

春日獨坐言懷

昔日歡娛憶此身名園歌舞接芳辰
蟄雷夜送催花雨香逕春迷鬪草人
合沓樓臺形勢壯風流鶯燕語言新
眼前舊物渾狼籍休怪提壺勸客頻

桃花

淺碧繁紅又滿枝
化工消息本無機
艷滋曉露鶯搖落
香漬春泥燕掠歸
金谷園中芳草在
玄都觀裏昔人非
自從雲隔天台路
劉阮如今夢亦稀

行春

行春無侶自遲留
汀草汀花暖更稠
馬援近來成矍鑠
謝安應合減風流
乍驚語燕穿人屋
無賴游絲絆客舟
老我光陰忽如此
不判尊酒復何求

送陳渭叟歸山中

人生少至百一別動經載不信歲月馳請看容鬢改先
生本是超絕人長竿學釣清渭濱釣頭不解挂芳餌岸
草汀花空復春大魚小魚求不得芒屨忽厭人間窄手
攜詩卷出萬山來覓湖邊閉關客終朝相對百不為口
中咄咄唯言詩飛花濁酒日色靜天地悠悠知者誰興
盡翩然即歸去鶴巢雛在門前樹他時我亦訪君家但
問青山白雲處

閒居自遣

喜無軒蓋歟柴荆靜裏天機見物情德愧王良千里馬
食無婁護五侯鯖海翁豈為鷗防慮稚子休烹鴈不鳴
一笑行藏頭已白新涼又到讀書檠

歲莫偶成

古人不可見養拙謝時髦隱傍淵明柳飢懷曼倩桃鑿
坏誰敢望抱甕豈應逃義見馮公偉仁依范叔豪乾坤
心浩浩江漢日滔滔老境誠難料繁荆未易薶親朋隨
宿草歲月掩秋濤夜短難籌促天寒象緯高燕情傷局

卷六十五
促松節感時操姜被流離析郛裾揖讓勞亂雲迷鶴路
短髮問魚舫念與追攀絕心辭寵辱熬世情甘木石我
輩豈蓬蒿萬事差池裏長歌對濁醪

送楊仲弘之京

迢遞官塘官樹陰征鞍催發短長亭荆吳雨漲河流白
齊魯春歸岱嶽青玉宇風雲開北極金臺日月聚文星
近聞下詔求賢急劉向終須論五經

和仇仁近歲莫見寄韻

瑤琴三疊此心閒
目送飛鴻信手彈
千里故人行自遠
一聲白雲和應難
賀公歲晚稱狂客
鄭老才高只冷官
且向吟邊了身世
西山暮雨卷簾看

越上感懷

曾負琴書到越中
別來三十五秋風
江山有待容回鴈
歲月無情類轉蓬
禹穴荒煙寒木老
鑑湖舊水野田空
騎鯨人去知何在
擬向沙邊問釣翁

憶孤山

自從梅樹委荒煙湖上風光不值錢
見說年來春好在擬攜尊酒報鸛鵲

冬至即事

結屋傍湖水對門三四峰
心灰無復煖鬢雪近來濃
孤鴈雨中過短書燈下封
平生故人意衰老不相從

題畫卷

翠疊洪濛色雲凝淡沲
春高寒不可到應有採芝人

為翁子善作晴江圖

故人遺我清江縣裏一疋紙白光晶熒心所好幾欲寫
作晴江圖塵土昏人意不到竹風入戶忽然鏗戛琅玕
聲為我胸中埽煩躁濡毫埽素遊其神乃悟周穆王時
西極之化人但見重巒列嶂盤春轉碧應接來不斷滄
浪之水倒影翻青春風檣沙鳥紛入眼物色明麗不可
陳因思神禹功疏鑿本天意愧我一寸筆浩浩逼茫昧
又疑此水通星河八月秋風揚素波君若乘槎訪牛渚
為言博望成蹉跎嗚呼雲邊縱得支機石成都卜肆今

日無人識

水軒夏日

碧窻晝寂幽意長
竹陰滿地琴尊涼
輕雷送雨遠不到
雪白水花生晚香

寄籌峰林芝巖三首

小院回廊日正長
綠陰幽草自生香
春風老矣猶多事
時送飛花出短牆

市聲不到野人居
滿院花陰晝睡餘
偶憶新城羅給事

枉將心力著讒書

青鞵布韞屨趑趄向何門學曳裾錯為黃金換詞賦
一生惆悵馬相如

雜詠三首

幽芳泣露質好鳥飲春聲盡向東風裏悲歡各有情
榮貴如風花安得長美好馮唐不解事却恨髮白早
涼露老荷葉蓮房亦已空可憐紅蓼花搖搖受西風

山居寫興

人事喧喧任奕棋青山數畝是歸期分將藥草鋤雲種
買得松杉趁雨移老去故人多入夢愁來閒事總成詩
芒屨布韞身猶健十里莎隄信杖藜

湖山春遊莫歸偶作

西月光景微斜簷尚如練攬衣昧旦起林巒淡方見景
風積霧斂曙牖新禽囀塵動九衢喧爛爛流目眩遊行
惜歡悰行行信郊甸遺情席細草賞靜引華饌山水信
恬和動息各恩怨雲斷舊時人梁回去年燕姿容一已

晚浩蕩羣芳變豈不懷爾思徇往何由羨

題畫龍門山桑乾嶺圖

昔我經龍門晨發桑乾嶺回盤鬱青冥驅車盡絕頂驛
騎倦行役苦覺道路永引領望吳楚日入衆山暝歸來
恆棲遲山水融心境寸毫寫萬里歷歷事可省理也存
自然疇能搜溟滓

題畫海南入貢天馬圖

傳驛每
喂梁肉

余吾天馬生水中毛如潑墨耳插筒雄姿挺挺浴海氣

一刷萬里追遺風九夷入貢賓來服畫出猶能駭人目
韓子休教喂地黃太僕能令飽梁肉誰憐東郊瘦馬肆
兀如堵牆汗血力盡德不揚尚望明年春草長

寒食日

密竹疎簾春晝闌疾風甚雨滿江南又逢寒食一百五
不覺行年六十三楚女腰肢從妙舞晉人標格祇清談
不勞燕子終朝語冷暖時情我自諳

讀秦紀

六國爭雄事已空
南遊勒石紀成功
早知三月咸陽火
不買魚燈照夜宮

嗟餘春

春雨足春水滿
岸花匝匝光風暖
人間杜宇最知機
曉得血流春不管
迷芳著物苦忘歸
直待楊花似雪飛
多少好懷成別恨
餘香沁入野薔薇

題溪山訪友圖

溪風吹長松
石路秋影薄
下有尋幽人
支筇入林壑
良

朋眇何許雜樹森草閣畫師發溪機筆底氣參錯我昔
事扁舟頗識山水樂于今日月駛此景亦蕭索愧乏買
山資老負宿昔諾展卷令人嗟高歌激寥廓

湖樓夜坐

孤樓侵樹小老鴈入雲迷月暗水光白夜溪鄰語低鐘
聲傳下竺梅信失西溪偶憶曾遊寺塵昏壁上題

田父詞二首

龍鍾田父住溪邨桑柘岡頭石路分猶領兒孫到城市

向人聽讀勸農文

處處叢祠鼓笛喧已占蠶麥十分添
醉騎牛背歸來晚
亂把山花插帽簷

春日偶成六言二首

兩袖水風春冷一抹山煙晚晴小檻倒披花影歸船遠
送歌聲

燕拂花陰繡轂人指簫聲畫樓楊柳六橋舊夢夕陽一段新愁

春日閒居雜興四首

宿雨兼風釀麥秋，餘寒欲斷自遲留。
杜鵑唬得百花盡，却向綠陰深處愁。

茶香庭院一枰棋，柳影侵階日自移。
因見刺桐花滿樹，等閒憶得故園時。

綠波如染帶花流，陣陣魚苗貼岸遊。
日暮畫船歌舞歇，春聲散入錦纏頭。

花底飛觴酒浪翻，纔迎春至又春殘。
日斜客散鑪烟盡，

自洗瓷瓶插牡丹

春江言別口占

送子清江皋江烟黯行路烏嘯山隱春潮長人爭渡世上無別離何由髮垂素

偶成小軸山水寄仰山長老熙晦翁

南山每獨往問訊西隱樓清陰藹喬木天風忽涼秋歸舟泝平湖遙見仰山月月色如德人萬古光不滅素練不盈尺寫此千里心欲知相憶不明月是知音

題李安忠畫雪岸寒鴉圖

北風萬里吹石裂古樹槎枒摧朽鐵羣鳥啞啞如苦飢
倦飛還向空林歇孤邨荒寒得食遠日莫沙邊啄殘雪
回情訴意各有態羨殺畫師心更切我嘗記得天隨詩
至今讀之長激越婦女衣襟便佞舌始得金籠日提挈
老鳥老鳥爾身毛羽黑離離况復人間厭爾唬何不飛
鳴丈人屋丈人屋頭春柳綠

題畫雜詩六首

岸水依痕釣艇閒
炊煙幾處出蘆灣
西窗正是斜陽好
一帶泥金抹遠山

月華如水天如空
蒼煙遠樹涵秋容
筆頭墨盡意不盡
參錯雲山三四重

數點寒鴉水遶邨
幾家茅屋掩柴門
白頭溪叟歸來晚
自把漁舟繫柳根

輕雲漠漠天影空
江邨雨過生微風
似嫌野外春淡薄
故點桃花淡淡紅

春陰淡蕩歸帆急
墨嶂層巒凝空碧
知是夜來風雨深
邨外野橋低二尺

採菱渡頭秋日晚
孤樓隔岸知誰家
參差遠樹雜雲氣
滅沒漁舟侵浪花

送江西熊履善茂才之金陵

君向秦淮我在吳
柴門白髮老西湖
書來莫附洪喬便
只道經年一字無

西湖春日壯遊即事

并序 錄二十四首

延祐戊午春偶以釣槎之暇因念西湖春日壯遊
尚歷歷然眉睫間光陰幾何余矍鑠矣遂成七言
二韻詩三十首以寫幽懷後我之生或不我信儻
遺老覽之則將同一興感焉

遶湖無處避芳塵
壘鼓紅旗彩鷁新
冉冉春雲來不斷
涌金門外踏青人

霍山廟食慶流虹
民物謳歌樂歲豐
七寶社回呈了馬
年年歸路雨和風

南屏山色染春煙路接高峰社鼓喧第一橋邊春更好
御舟閒在翠芳園

問誰偏解占風光飛蓋金鞍白面郎山北山南遊欲遍
畫船教艤集賢堂

瑞煙祠宇隱垂楊士女穿花語笑香三十九賢生翠碣
虛舟亭上借傳觴

鏤玉雕瓊簇鬧竿珠花翠葉縷金籃東家年少貪遊冶
正值明朝三月三

流蘇兩兩挂船頭
繡額珠簾不上鉤
金縷緩歌家宴靜
午前先入裏湖遊

紫染春羅窄袖裁
伶人楚楚自詼諧
部頭教奏金娥曲
盡向船棚一字排

笙歌簫鼓沸春濤
耳目難禁應接勞
院落鞦韆誰氏女
綵繩擲起過牆高

萬柳搖金接畫橋
一清堂外景偏饒
文章太守開華宴
預報龍舟奪錦標

歌妓娉婷畫不成，去年初籍教坊名。
新腔翻得梨園譜，喜入王孫喝采聲。

園丁花木巧，栳捲萬紫千紅簇。
綺筵折得青梅小，如豆獻來還索賞金錢。

揉藍染水翠浮山，隄上亭臺錦繡間。
花柳禁人攀折去，要畱春色大家看。

進餘微露與流香，散落人間任品嘗。
處處旗亭招客醉，大書不是趕春場。

珍禽翠羽養雕籠
列向船頭盡不同
憐殺錦鸚偏解語
喚人提挈避東風

豪家遊賞占頭船
趁得風輕放紙鳶
手拍絲輪爭上下
一時回首看青天

嬌民技藝也天生
鬪巧搜奇事事能
稚子土宜偏劇戲
浪兒黃累十三層

一路亭臺間酒家
漸看楊柳綠藏鴉
太平官府無民訟
補種沿隄四季花

畫船過午入西林人擁孤山陌上塵曾被弁陽模寫盡
晚來閒却半湖春

要囑園丁取折枝紅桃白李紫薔薇石函橋畔人煙晚
挑得春光一擔歸

遙看暝色下漁汀金鴨香消酒半醒倒轉船頭元有意
檻邊人報放流星

天街夜市已喧闐半掩城門玉漏傳籠燭絳紗爭道入
湖心猶有未歸船

送得春歸夏又初名園不放玳筵虛只知富足家家事
肯為兒孫教讀書

慣見升平春復秋分明往事昔年遊西林橋外青山色
幾度夕陽人白頭

幽居

一徑荒涼長碧苔竹門斜對遠山開自操清白傳家譜
不受青黃致木災穴鼠苦銜詩藁去溪螯喜薦酒尊來
東籬滿地金錢菊多謝西風為翦裁

題唐十八學士圖

唐家天子尊黃屋大業隆興調玉燭當年十八登瀛仙
弘文日侍分三六兩京初定四海清君聖臣賢古難續
立本圖眞亮為讚遂令書府藏諸櫝後有龍眠傳此本
禮樂衣冠激流俗自從淪落向人間畫手紛紛互翻覆
千年事去君莫問畱得青編遣人讀蕭蕭馬耳射東風
長安道上春山綠

謾成四十二首

錄十二首

徑曲交加鎖竹陰不教寵辱到林扃
心閒莫道渾無事粉落松花汙鶴翎

參天楊柳手親栽一院西風戶牖開
落日尚餘三四尺山平水遠看秋來

小春天氣未生寒綴樹朱櫟正入看
昨夜海棠開數朶一雙蝴蝶上闌干

新霜尚薄樹聲乾寒水無痕倒浸山
知是釣船歸較晚鷓鴣嘎嘎起蘆灣

飽霜紫芋細凝酥旋撥寒灰出地鑪慚愧鄰家新酒熟
客來酤得滿葫蘆

蕭蕭野老髮垂肩家住湖西杜若煙載得茭根入城賣
西風落日滿歸船

風琴流響韻虛堂湘簟欹眠水一方靜裏數聲棋剝啄
乳鷺淡向綠陰藏

槐陰滿院喧巢鴉蜜房香老蜂趁衙鄰家艇子釣魚去
水光搖動金蓮花

北風小雨戒新寒，隔水楓林葉已丹。
莫道閒門知己少，白鷗飛去又飛還。

燕山楚水曾為客，慣聽霜砧擣月明。
不似新愁怕新鴈，秋風吹落兩三聲。

晴日穿花煖似烘，風簷微動玉丁冬。
山童睡起心無事，斫得筇枝補鶴籠。

雲歸雨歇湖水平，五色螭螭山邊明。
唱歌舟子採菱去，十里柳隄蟬亂鳴。

次筠軒詩韻

幽軒列萬竹，愜此冲澹襟。乃知心跡遠，不在山林深。客散動秋影，鶴歸分夕陰。至樂寓言外，任鼓昭文琴。

畫意四首

紅塵海裏嬾低顏，石路迢遙入亂山。擬向雲邊種黃獨，幾時容我屋三間。

江花江草映江樓，寫出江天一片秋。隔岸小橋低數尺，淡煙消處見漁舟。

幽人自樂山中趣
閒訪山家入山去
記得西峰阿那邊
亂雲遮斷無尋處

緣溪路滑蹇驢遲
水色山光總入詩
還勝襄陽孟夫子
滿身風雪灞橋時

和山邨見寄詩韻二首

休將野服染緇塵
大患須知為有身
藥餌任從畱過客
是非終不到閒人
山中相隱懷弘景
谷口躬耕羨子真
午睡醒來春事晚
枝頭梅豆已生仁

不成一事鬢先皤朋友惻惻喜琢磨千里音書歸鴈少
滿城風雨落花多迸階新筍微過竹脫繭春蠶欲變蛾
惆悵少陵身老大壯心激越醉時歌

浙江晚眺

昔年吳越事并吞畱得青山只斷魂落日正明漁浦渡
歸鴉遙點范家邨雲分雨脚回沙溆帆趁潮頭出海門
欲問淒涼千古意鷗夷何處有兒孫

秋日閒咏

西湖晴雨畫圖間坐倚闌干自解顏無酒可供千日醉
有錢難買一生閒草衰春色來時路鶴宿秋聲起處山
橫笛吹殘天又晚釣舟燈火入蘆灣

集句和陳渭叟見寄詩韻二首


寒食離家麥熟還不應空老道途間會須伐竹開荒徑
剩著溪南幾尺山

池邊月影間婆娑卧聽行雲一曲歌閒憶昔年為客處
囊中無物只詩多

集句遣懷

嬾慢無堪不出邨當年心事與誰論
如今老去愁無限
雨打梨花深閉門

元詩選初集卷六十五



總校官候補中書臣吳紹潔
校對官編修臣馬啟泰
謄錄監生臣徐騰

欽定四庫全書薈要

集部

元詩選初集卷六十六



詳校官候選知縣臣吳甸華

欽定四庫全書舊要卷二萬四百二十六

集部

元詩選初集卷六十六 長洲 顧嗣立 編

張雨句曲外史集

雨字伯雨一名天雨別號貞居子錢塘人宋崇國公九成之後也年二十徧遊天台括蒼諸名山棄

家為道士登茅山授大洞經籙開元宮王真人偕之入京璽書賜驛傳欲官之自誓不更出往來華陽雲石間作黃篋樓儲古圖史甚富世稱句曲外

史至正間卒于開元宮齋舍外史風裁凝峻趙文敏公一見而異之授以李北海書法范德機以能詩名外史造焉范適他出有詩集在几上外史取筆書其後為四韻詩守者大怒走白范范驚曰我聞若人不得見今來天畀我友也即日詣外史結交而去由是外史名震京師一時袁伯長馬伯庸楊仲弘揭曼碩黃晉卿諸人皆爭與為友他日謁虞伯生虞問能作幾家符篆乎荅曰未也虞連書

七十二家示之外史下拜曰真吾師也自後與虞
手札必執弟子禮晚年尤為楊廉夫所推重吳郡
徐良夫序其詩曰虞范諸君子以英偉之才諧鳴
于館閣而流風餘韻播諸丘壑之間外史以豪邁
之氣孤鳴于丘壑而清聲雅調聞諸館閣之上雖
出處不同其為詞章之宗匠一也夫以方外詩人
而與館閣詞臣相頡頏寧非一代之盛歟

天池石壁為鐵崖賦

嘗讀枕中記華山閼中吳神泉發其顛青壁繚其隅春
風四山來羣綠互紛扶羽觴曲折行浮花與之俱採芝
搴薜荔洗玉弄芙蓉聲叟頗好名石窪作魚湖鴻乙志
草堂挑煙遂成圖而此滌煩磯閱世如擣蒲發興雲林
子盥手與我摹居然縮地法挈入壺公壺

次倪元鎮遊虎丘

振屐稍踐危援藤遂支滑尚餘金玉氣山川相映發小
吳不滿眼軒中樹如髮花覆闔閭城石繞生公榻適與

幽人攜及茲莫春月坐久得忘言移鞞蔭清樾

夕佳樓

西山朝氣爽南山夕氣佳朝爽人共忻夕佳吾所懷
山僧閱世久結廬深避乖蕙樓將對峙菌閣亦雙排
維南列宗阜不受煙嵐霾我亦遲莫人心跡倦鳥偕
茲焉寄高躅庶與靜者諧

題墨蘭贈別于一山之京師

三月愁送客春寒雨如霰冥冥返塞鴻悄悄棲梁燕揚

帆五十日蓬萊望中見欲持猗蘭操一奏南薰殿

張師夔畫謝家池塘

春風颯然至幽人午夢醒遙見池塘綠不知春草生如
何騎馬客亦向夢中行

濱洲雲巢圖

張彥
輔畫

蒼山不受寒裏以白兜羅借雲以為煖我意不在多小
營丹鶴巢高棲翠雲柯飛仙度鸞笙老人臥雞窠誰能
江海去風雨一漁蓑

寄題劉彥基丹室

昔聞冲虛宮遠在錦江頭往來多異人東望不可求借
問鴻寶書枕中今在不尚餘一丸藥光景夜不收食之
生羽翼飛去十二樓下視何蒼蒼至情難久留我將拾
瑤草遲子於玄洲

次韻晉卿翰林贈陳秉彝

金華黃太史出為儒臺冠詩文齊六經奇古誰敢傳如
掇明月珠妙在九曲穿而子工筆札狗監非所薦挈之

登龍門果獲尼時彥孜孜勤執經矻矻勞染翰敏手不
暇給精華且屢換憐才吾革事子乃羞自獻由茲數來
往無事輒相見湖嶺錯紆煙霞爭變幻一夕快雨餘
春物已消半言歸天台與俄頃語離散此手不易執明
日柁樓飯迢迢望白雲瀑布聲許悍赤城跨滄海朝霞
以為岸儻遇仙者徒勿易樵牧賤予衰志求道千載猶
莫旦老經三百家一一理殘卷霜毫犯冠籜墨汁滓衣
汗何功使願果盡力輸老腕子書能瘦硬淚眼秋隼健

唯餘篋中字照我目光爛送子望崖返回目窮海甸春
夕豈不短反側移漏箭纔夢金庭游還逐濤江亂海知
家庭樂旭日陰始泮身扶老人杖衣憶慈母線還期當
及時遲子秋水觀栖栖寡儔侶孤坐至日晏追步太史
作用以申繾綣

遊龍井方圓菴閱宋五賢二開士像

獨尋招提遊果得世外歡昔賢所棲集畫像藏屋端山
僧啓鎖魚不待啜茗乾脩廣各異製精采俱生完堂堂

蘇長公英氣邈難干
筇杖紫道服天風吹袖寬
清獻薄鬚眉示我鐵肺肝
尚餘所施物片石櫛而寒
侍郎胡金華高括侍中冠
眉間可容掌手版出中單
潁濱與淮海秋色亞層巒
參寥獨緇衣領髭茁茅管
最後辨才師文茵高座安
空山一室內舉目皆龍鸞
再拜傾挈壺喜極重悲酸
去之三百載歸路何漫漫
斯人為列星下視蟲沙繁
寧不念學子道術救彫殘
抵舍亟摹貌微哉難控搏
夢中儻未遇展詩時一觀

無波古井水

古井何泓然不食自甘冷
去來絕攀緣
挽斷轆轤綆
唯有中宵月
圓中時照影

清權尊師集中覽庚戌見褒一詩感念今昔自傷之情

天既勞我晚不如早息
我奚止七不堪于世無一可空
山酒半瓢禿髮花三朶
平生仲長統誰能曲如鎖

種樹

植梓五十本移松八百栽山靈借好雨侶為道人來青
意爭鬱勃細聲亦吹洒松如稚子長梓長未盈把吾衰
詎能待將以待來者

三月十三夜對月

幽篁不見天況乃見月色晴來春尚佳豈不有餘日離
離花氣上稍稍簾陰直啼鵲夜不眠聲欲碎啣石聞聲
思逾寂悟賞在茲夕

獨行

春泥未成沙曳屣柔且平春風不鳴條振衣涼且輕我
意本靜愜中林優獨行松蓋無曲影水樂皆全聲踽踽
迫前岡悠悠度斜阮老樵眼如貓見我不問名直贈金
光草疑是古先生

倪元鎮玄文館會飲

親知貴浹密屢此良讌會堂陞自崇廣促席歸臥內說
詩盛使氣屈折高李輩更端輒笑謔知節已沾醉玲瓏
簷花亂蕭屑風竹碎政使韓伯休移牀夜相對

奔月卮歌荅鐵崖所作

甃社明珠奔入月脫殼政似風蟬潔漁網出之不敢視
滌盡含沙光不滅文昌四星吞在腹一一金晶大如菽
蜃物還來作飲器日夜雄雌繞林

一作虹
五茅

屋一扇桃核

寬有餘半葉蕉心卷未舒飲非其人躍入水怪雨盲風
生坐隅置之天上白玉盤斗柄挹酒長闌干李白跳下
鯨魚背持勸我飲相交歡幽宮馮夷為予泣酌盡海水
百怪出還我平生老蚌胎許君醉臥鮫人室

玉笙謠為鐵門笙伶周奇賦

我有紫霞想愛聞

一作君

白玉笙懸匏比竹無靈氣昆丘

採此十二莖鳳咮銜明珠鳳翼排素翎金華周郎妙宮
徵子晉仙人初教成月下吹參差羣雛亦和鳴緱氏山
頭白雲起七月七日來相迎長謝時人一揮手飄下滿
空鸞鶴聲

墨龍

高昌世子寫墨龍此龍乃出開元中東井水與天河通

龍下取水遺其蹤道人識為黑

一作墨

帝子逃入世子之

筆鋒并頭夜半飛霹靂元氣淋漓雪色碧一鎖銀牀五
百年纔點目晴生羽翼

聽雨樓

雨中市井迷煙霧樓底雨聲無著處不知雨到耳邊來
還是耳根隨雨去好將此語問風幡聞見何時得暫閒
鐘動雞鳴雨還作依然布被擁春寒

遊惠山寺

水品古來差第一天下不易第二泉石池漫流語最勝
江流湍激非自然定知有錫藏山腹泉重而甘滑如玉
調符千里辨淄澠罷貢百年離寵辱虛名累物果可逃
我來為泉作解嘲速喚點茶三昧手酬我松風吹兔毫
趙千里聚扇上寫山次韻題

翠水丹山氣磅礴幾疊香痕經手握何年破鏡飛上天
吳淞水翦并刀薄江南寶繪多遺餘王孫不歸恨蘼蕪
蘼蕪消歇秋風起班姬為我歌烏烏

王時敏聽雪齋

頑寒顛顛河流漸銀濤鐵騎交奔馳瓏玲淅軟瓦溝滿
坐窗已有幽人知東家暖客紅醅凝嘈雜新聲迷聽瑩
後園壓折萬琅玕雪多政自無人聽我時空山夜寂寥
風簟雪竇篩瓊瑤希聲疏越不可盡鳴球戛擊如聞韶
憶昔齋居困學翁大書聽雪煩楚龔百年勝事將無同
不傳師曠傳王恭鶴氅明朝行雪裏須辨龍頭煎雪水
牀下何人聞鬪蟻喚起春雷來洗耳

用韻送淨月上人

陰崖顛風無時興，篁竹偃地虎晝行。
斲冰積雪臥空谷，春至唯聞禽鳥鳴。
華陽南僂洞窗小，香煙西放峨眉道。
神僧問訊破孤寂，把臂入林一傾倒。
帕頭蒙寒驢背馱，泥滑穩于杯渡波。
寄謝少年王敬和，獨行其如法汰何。
效隱居擬古樂府寒夜愁

夜寒生，羣獸驚。寂兮寥兮，栖遁情陰宮。
漫漫落葉平岡頭，霜月弄微明。
寒漏泣，寒絃緊，愁腸結。
一作斷愁語盡人

生異木石思來誰能忍

次韻率性來山人見貽之作

南峯後靈石前嵐霞蒨絢爭春妍貧家客來淨埽地亦
有一瓶紅杜鵑東坡七過山南塢山人能記坡翁語君
方騎馬聽朝雞為我入林來聽雨雨聲吹斷聽松聲怪
石長松為友生憐君慰我支離者不飲向人空復情我
如病馬離羣去君如伯樂能相顧羊羣好在金華山夢
裏相逢猶識路

早春對雨雜言

寒谷望春如望赦
雨雨風風惡相嚇
牀頭敗絮未嘗溫
石上瘦花渾欲謝
三時儘辨禽鳥鳴
合澗助為風水聲
白水田頭漫無路
老稚種麥已青青
朝晴獨見扶犁叟
人生合作無犁耦
不須識字只耕田
酒杯也到扶犁手
風雪中得金陵諸公詩二首

雪作衆禽驚窗幽
亂霰鳴愕然身渡
落莫矣歲崢嶸松
竹聊娛拙乾坤若
忌名故人不相貸
書札到柴荆

落木從風靡支流趁谷斜山空不須說歲去若為遮飢
雀掃窗紙寒魚嚼雪花推書更清坐席煖到昏鴉

湖寺擁碧軒

喧寂一塵隔湖濱出寶坊荷陰分補袖水氣雜燒香書
勘烏皮几茵敷白氎牀從來已公屋詩客許徜徉

寄洞庭王子正

一作聞洞
庭之勝

洞庭山似簇銀闕翠芙蓉安得滄浪子同尋縹緲峰魚
龍隨水落橘柚待霜濃未必桃源似雲帆躡去蹤

齋居偶興

絕澗多靈石中開小洞房
醉醒依竹素晴雨看梅黃
樹暗鶯聲澁巖虛水韻長
未能超賈馬自足上羲皇

午日簡楊廉夫

客有擁琴至吾寧折簡招
足音垂谷口雨氣截山腰
酒倩紅泉瀉花為絳節朝
不嫌泥濘極一舸段家橋

雨中

推枕遽然覺高齋人跡稀
卷簾芳草短看雨杏花肥
薄

莫寒仍在中林願稍違一遷隨谷鳥喬木是耶非

除夜

忽忽歲云莫徒興白首嗟山留待伴雪春禁隔年花把
卷因遮眼分餽且膠牙自緣身懶情莫遣送窮車

澗北梅三月始華

陰澗殘梅枿臨流一向欹但存孤注在敢恨一生遲凍
雨如相煦春寒不受吹後時翻見獨宰物遂成私

茵閣

巖架菌芝閣榜題松雪扉雲來畫簷宿龍向墨池歸對
几琴三疊倚闌山四圍仙靈能夜降應得授玄機

早秋

每嫌新酒少尚喜故交稠離落三家墅梧桐十日秋月
生微顧兔星淡沒牽牛亦欲觀多稼江湖雨未周

開元真人見貽劉商觀奕圖石刻毫髮布縷皆
盡精妙蓋李龍眠臨唐畫本茅君彥模勒為玉
局仙翁所藏云

新桂蘇蘭者能來立坐隅徒聞玉楮刻遂信石枰圖妙
蹟傳仙李高名重大蘇向來林下意不敢易樵夫

書懷二十韻奉呈虞集賢

昭代千齡運斯文一柱功初當延祐日晚識廣陵公朝
士因推轂先生猥擊蒙睽乖遺廿載寤寐接孤風太史
山川彥仙儒館閣崇置身清切上用志杳冥中句法黃
初過才名冀北空朔南馳使節江漢借歸篷酒問餘杭
姥泉尋六一翁境非秋水觀寺即紫微宮侍坐要王遠

移家近葛洪於馬承歛唾足以振罷癯卓爾身為貴胡
然老見攻戰肥終道勝德重豈途窮玉趾閒迂步麻衣
病鞠躬茶煙窗冉惹墨沼樹玲瓏飢甚無瑤草招來有
桂叢輸心何落落把袂輒怱怱易進乘軒鶴難追戲海
鴻明朝去吳會長笑為誰雄

元日雪霽早朝大明宮和辛良史省郎廿二韻

并序

延祐改元三月民瞻石宰相過京師承需鄙作且

辱先施之惠林下朽生不能造館閣綺語幸于言
句外求之愧悚而已

纔設中庭燎俄看密霰飄歲開環甲紀星動指寅杓鳳
集天門榜珂鳴月殿橋卿雲同四表和氣集三朝陞級
肪初截雲層玉旋雕句陳分彩隊步輦簇青腰積屑承
盤重吹花到笏消逶迤光斧座凌亂綴珠翹樂共爐煙
合班隨翠袖招閨風游廣漢玉局道逍遙北戲魚龍舞
中蟲虎豹調旌旗攢顛顛冠釵掠招搖穆酒曾觴母洪

崖及見堯萬年臨紫極一日慶璇霄朝會儀如此騫騰
意頗饒身唯參寂莫世豈絀紛囂姑射消疵癘蓬萊倚
沈寥瑤華攬戴勝珠樹引回鑣有術探鴻寶何人識爨
焦竟須窮海岱直擬並松喬書就神牀寫香從別室燒
憐君守華省琢句廢春宵

馬塍新居

浮家泛宅意何如玉室金堂計未疎歸錦橋邊停舫子
散花灘上作樓居澹然到處自鑿井玄晏閉關方著書

但得草堂貧，便是人間何地不樵漁。

西湖放鐙

共泛蘭舟鐙火闌，不知風露溼青冥。如今地底休鋪錦，
此日槎頭直掛星。爛若金蓮分夜炬，空于雲母隔秋屏。
却憐牛渚清狂甚，苦欲燃犀走百靈。

次韻段推官觀潮

雪濤卷入白螺杯，雲夢吞將濫觴堆。陳馬直從天漢落，
颶風先自海門來。青山一向開銀壁，黃纈中央立露臺。

好在畫圖留壯觀江頭白首不堪回

贈紐掄大監

論卷聚書三十萬錦江江上數連艘追還教授文翁學
重歎徵求使者勞石室談經修俎豆草堂迎詔樹旂旄
也知後世揚雄在獻賦為郎媿爾曹

請以蜀文翁之石室揚雄之墨池杜

甫之草堂皆列學宮又為甫得謚曰文貞以私財作三書院徧行東南收書三十萬卷及鑄禮器以歸虞奎章記其事邀予賦詩如上

老學齋書懷寄京師故人

手種羣松數尺圍
草深南澗客來稀
一經斷送垂垂老
萬事安排念念非
晨待樵蘇才蓐食
涼驚絡緯尚絺衣
蓬萊坊裏清宵月
也到山家白板扉

晨興

聊與梅枝說歲窮
真成古木共衰翁
百年勲業何煩爾
一世雲山不負公
寒夢漸消窗影上
春容已在雨聲中
晨興陡覺詩神王
未放韶華角長雄

次韻虞公和斷江和尚種松

松下微吟愜病悰，支離潦倒侶支公。
頂因巢鶴翻成結，心為依禪畢竟空。
陸子壇前春古淡，葛洪井上雨青蔥。
茯苓乞與楊員外，誰復緘詩過浙東。

遊華藏寺

湖上亂峰如髻鬟，湖邊才子駐春鞍。
霜餘鸚鵡沙汀淺，日落麒麟墓道寒。
古壁風篁無盡意，清尊雲海有餘歡。
遠遊未羨鷗夷子，直向飛仙乞羽翰。

馴鷺

孑然馴鷺雪霜明下瀨求魚自在行碧玉鐙檠雙足瘦
白麻衣被一身輕海鷗見事因何晚凡鳥題門也不情
輸我鴛行舊儔侶舉頭寥廓總雲程

題雪景三香圖二首

春雪無聲入畫堂東風渾似北風涼祇緣何遜題詩少
信是徐熙落墨強青鳥下迎羅襪步蒼髯來近玉臺妝
匡廬也入幽閨夢睡裏山花各自香

雪羽飛來雪意濃國香狼籍暝煙叢倩誰與翦吳淞水

愛爾能吟柳絮風翠袖佳人玉跳脫平頭奴子錦熏籠
劍南畫手看前輩著粉施朱或未工

范以善雲林清遠館

華陽

一作
雲林

范監居幽眇不到玄窗未易逢山氣半為湖

外雨松聲遙蒼嶺頭鐘常聞神女騎龍過亦有仙人控
鶴從安用乘流三萬里小天元在積金峰

盧疎齋集

并序

盧疎齋集宣城校官本讀之一過生氣凜然有懷

哲人援筆而賦

人物西清第一流，曾看繡斧下瀛洲。
難求冀北千金骨，空載江南數斛愁。
小謝夢無青草句，大蘇詩有景疏樓。
敬亭依舊峨眉月，付與盧敖一作騎鯨汗漫游。

書東坡先生畫像

峨嵋秀色杳難攀，玉局仙人不受閒。
南斗日躔一作辰韓

吏部西湖風氣白，香山寧

一作從

教刺舌奸邪黨，可惜低

頭侍從班試

一作受

問東坡鐵拄杖，于今海上未曾還。

經碧浪湖奉懷吳興公

湖水秋空玉色勻蒹葭纖

一作殘

雨上

一作酒

綸巾重來羊

峴誰沾淚却顧龍門不見人獨放酒船尋鱸具誰容狂

客吐車茵西風白羽元非用只為人間苦

一作善

障塵

舟次涵湖用柳博士夢薛立卿詩韻寄倪元鎮
兼懷鄭明德

思遠重逢茅小君香銷酒盡路三分五湖歸思浮天水
一霎秋陰過雨雲柳子篇章渾可法花奴絃索共誰聞

惟應自洗唐溪石填得金泥小篆文

次韻劉伯溫御史春遊

草木幽馨澗道微白雲拄杖去如飛獨尋玉女洗頭處
相伴仙人採藥歸幾疊翠微深杳杳一簾紅素亂霏霏
何堪酒債兼詩債老却江南白苧衣

題范德機編修東坊藁後

一編上有東坊字慚愧詩中見大巫直想瘦生如飯顆
竟從癢處得麻姑咸池水淺孤黃鵠空谷天寒病白駒

擬共風流

一作西風

接尊酒祗愁塵土沒雙鳬

二月病懷

煮藥香中聽雨眠都緣未熟養生篇
雪消春水深三尺日上花陰過幾甌
世事悠悠高枕外衡門寂寂暮霞邊
自慚病鶴推頽甚却顧雲霄意悄然

吾愛吾廬

吾愛吾廬聊復爾眼前白石與蒼苔
水從林木陰中過風自房

一作簾

攏曲處來薄有餘情歸竹素竟

一作都

無長

物受塵埃先生閉戶成真

一作真成

嬾詩債敲門不厭催

乙亥二月還錢塘書懷寄劉師魯

黑頭時與王孫別春草又生天一涯貧甚馮驩猶有缺

歸來丁令已無家葑田湖窄殘舟

一作遊船

少墓道山荒剩

一作墳

屋斜還憶菌巢書數卷雪麋應護手栽花

雪麋玄洲白犬

也名

荅楊廉夫

黃篋樓中惟飲酒樓下長溝鳬雁多溪頭橋斷浮青草

湖面風來生白波，饒奴竟煮脫襦。筍老魚戲，
唼如錢荷。詔書寬大到海角，河北飢民一作
氓爭倒戈。

十二月五日雪晴

丁亥

日光玉潔千峰立，
使雪晴時一氣凝。
當晝鑪亭催埽巷，
犯寒魚榜借收冰。
松皮石裂號飢鼠，
窗隙塵消觸凍蠅。
青茁菜芽渾可愛，
倩誰春餽卷紅綾。

送鄭明德適越

四十日春廿日雨，
問花隨柳意茫然。
竹根臥瓶高筆塚，

竈下生薪連木煙茅家名餘鐵鑪步龍井氣脇金沙泉
稽山酒船速回櫂遲子歸來烹蕨拳

虞先生送張元朴回龍虎有云塵尾每懷張外
史鵝羣今屬薛玄卿元朴索次韻

想見先生戴笠行黃茅岡上看陰晴承聞祖道同疏傳
鄙說還鄉侶長卿海內好詩元自少江西行李不嫌輕
謫仙愛與元丹語煙子而今亦有名

鐵笛道人新居曰書畫船亭作詩以寄

蘇州去訪揚雄宅近水樓居似月波東府官曹知者少
西山爽氣望中多臺招天上仙人鳳池養山陰道士鵝
誰和涼風吹鐵笛莫愁艇子桺枝歌

新栗寄雲林

竭來常熟嘗新栗黃玉穰分紫殼開果園坊中無買處
頂山寺裡為求來囊盛稍共來禽帖酒薦深宜蘸甲杯
首奉雲林三百顆也勝酸橘寄書回

荅董子羽見寄

清都聞已住多年鶴駕鸞駟與後先閭闔五雲宮樹暖
蓬萊初日羽衣鮮神仙翰墨唯皇象史館人材總孟堅
天上春風如舊識殷勤吹送寄來篇

秋詞

此首重見
梧溪集

香散天街靜玉珂水臺風殿夜如何星從河漢淡中落
一作
沒秋在梧桐疎處多鸞影不曾離寶鑑蛛絲先已墜
金梭君王繭館詢遺事却擬鑾車共載過

吳興舟中

茗溪斫鱸腹偏腴取酒烏程清若無最憐楊柳破二月
絕勝蛾眉遊五湖船頭濯足畏魚淦港口卸帆驚鳥呼
林巒在處著舟楫儻有剩田吾欲租

題彭大年禱雨詩卷和仲舉韻延祐己未開玄
道院作

羽衣秋薄翦湘荷茅屋山宮補綠蘿白石資方青飢飯
洪崖借乘雪精騾松雲暖憶春游岳冰草寒憐曉渡河
使節南歸如見念峯頭笙鶴好相過

次韻題呂氏園館

因向雲間求二陸西施浦口弄雲沙東風勒住螭頭舫
湖雨吹開繭栗花到處華房通曲密舊時醉墨悞欹斜
一聲歌板銀瓶側亦見玉童雙髻鴉

再次韻實喇卜郎中春遊二首

楊柳三眠午未醒楊花飛雪散星星海中蜃氣春浮島
月下胎仙夜降庭尺素書來雲錦織紫鱗躍處浪紋腥
樓前政有三株樹翦斷西山一半青

鄰近桃源雞犬家不緣迷路得看花衣裳總濕三危露
服食惟消五色霞鶴塚浪磨崖上字漁舟潮閣渡頭沙
石盤棋子都狼籍莫向人間問歲華

八月十五夜待月

移牀露坐閒臨水浴鵲灣頭足芰荷秋已平分催節序
月還端正照山河老憐宋玉生悲思狂憶桓伊作浩歌
雲漢茫茫一卮酒白頭慚愧古人多

春將過半病懷索莫惜無可與言詩者得句自

遣山澤癯者云

一一花栽繞屋廬
半春多病意何如
緣詩太瘦終無補
與酒全交漸要疎
硯席留香非長物
齋庖得筍是佳蔬
鶴羣呼喚來同飲
新綠濺濺已滿渠

女仙江靜真碧遊仙詞

衣劍符圖有子傳
生如孤鳳蛻如蟬
方畱橘葉聊供母

誰信桃枝已得仙

張桃枝漢司隸校尉朱寓季陵母也
行陰德久聞在易遷得為侍郎事見

真蕭索簾幃通素月
玲瓏環珮曳空煙
麻姑壇上花姑

老相共乘鸞欲著鞭

碧筒飲

採綠誰持作羽觴使君亭上

一作竹
林人共

晚尊涼玉莖沁露

心微苦翠蓋擎雲手亦香飲水龜藏蓮葉小吸川鯨恨
藕絲長傾壺誤展淋郎袖笑絕邪溪窈窕娘

上京賜宴王眉叟有詩次韻

從事何緣過草堂行都遣賜玉壺方遠勞使者紅塵騎
爛煮仙家白石羊中聖敢辭千日醉承恩獨許四明狂

金莖賸有三清露潤及葵心向太陽

鳳凰山懷古

江右夸吾浪得名豫州英槩亦沉冥夕陽枯木山如赭
秋雨荒臺草自青漢苑玉魚誰復葬昭陵石馬亦無靈
可憐白髮商人婦猶向鐙前話後庭

次孫大方仙興詩韻

仙仗來時瑞霧屯真人玉女侍靈軒亭亭珠穗香煙直
爛爛扶桑玉色溫花雨埽塵鸞帚溼島雲承韞蜃樓昏

至今星斗天壇夜望拜青都虎豹門

送人之茅山

桃竹齊眉草屨柔江雲曉溼木棉裘茅山一去五百里
楚月相望十二樓林下甌香黃獨月松根鉏冷茯苓秋
藥瓢料得歸來滿多病微軀我亦求

雨裏郭子昭御史

洞戶靈雲晝不開大茅南面水縈迴深山此日蛟龍喜
舊雨故人驄馬來澗道浮槎高寄樹石幢陰篆溼生苔

銷愁底用金陵酒
賸引窪尊枕瀑雷

寄倪元鎮

雨水初寒雪復作
春風相欺何太顛
誰依井竈皆獸迹
獨擁書冊猶鳶肩
枸杞埋根乍難斲
櫻桃放花殊可憐
賀監宅前舊游處
快放柳條維酒船

次韻元鎮見寄

衣桁常容蛛網懸
石牀渾讓女蘿牽
道術何煩孔郎祀

廟一作

屋廬政用郝超錢
泉崩澗底歸樵路
雨壓廚頭蒸

木煙誰見西鄰拆書夜一枝風竹鵲鳩眠

懷茅山

我有草堂南洞門常時行坐虎同羣丹光出林掩明月
玉氣上天為白雲遙憶田泉洗蒼术更思陶澗采香芹

歸來閉戶償高臥莫遣人書白練裘

西湖竹枝詞序稱
伯雨詩俊逸清澹

儕輩鮮及有如丹光出林掩明月玉氣
上天為白雲不目之為仙才不可也

梅雪齋雅集分題得酒香

醲郁芬香味更嚴甕間飄滿讀書簾絕勝金鴨薰花氣

錯認山蜂釀密甜三嗅初令消渴止一中定埽宿醒淹
醉翁鼻觀還親切不待狂僧寫布帘

唐僧懷素有
草書布帘帖

次韻荅吳興黃伯成

行盡松陰黃葉株三叉路口問茅廬青山對語惟捫蝨
落日催歸獨跨驢土木形骸嵇叔夜波瀾文字木玄虛
殘年記得相存問莫道天寒無鯉魚

贈別休休菴了堂上人

老僧十年不出戶袈裟搭架風披披祖衣畱在阿蘭若

佛法傳過高白麗客牀雪鍊一甌茗經藏苔昏三尺碑
木向舊房看偃蓋卷中原有古松枝

春溪曉渡

怪底朝來雲氣升雨晴洗遍碧磴山腰行李去未遠
谷口人家呼渡應彷彿簫臺凌鳳吹安排春水理魚罾
臥游已愜平生志深負牀頭六尺藤

雲林席間懷鐵笛簡草堂

花朝無花也可憐桃李矜持不作妍爛聽雨聲眠白晝

夢乘艇子上青天閒居久絕浮雲志老病難趨卜夜筵
絳帳先生惟寂莫後堂自理琵琶絃

丹陽道中觀稼

行遍山東黃葉村縱橫草路細難分荒雞戶暗蠨蛸月
落鴈天黏穠樞雲下澤車傷縣酒榷延陵祠畔讀碑文
空山更覓牛羊逕入獸依然不亂羣

鄧學可畱穀城戴堯文許雪中書寄二友

鉤簾坐對西山雪茵閣前頭正向陽剡水當時元有戴

穀城今日可無張披雲松樹鱗鱗溼瞰屋山泉角角方
染就綠霞春帖子不妨青鳥便銜將

賦西塞山送趙季文湖州學錄

往來苔雪舊山川流水桃花思杳然溪女浣紗春雨後
仙人把釣夕陽邊漁歌未用朝廷覓惠政先繇隱逸傳
不信青衫浣塵土水晶宮裏住三千

風雨近寒食未已

一榻清寒戀舊毡無言桃李不成妍桺長漸礙螭頭舫

雨重渾迷卵色天誰向侯家分賜燭自依丹井食新泉

海南上巳才登塚

見坡語

忍待晴泥埽墓田

和馬伯庸御史春游

山中塾角雨仍斜歲歲春風換鬢華湖口水香魚

闕

食冷客思家鷺峰埽石繡經葉龍洞分符調井花

闕

城郭莫醉紅猶帶臉文霞

次韻張仲舉題宋周漢國公主甲第圖

主家樓觀蔚參差想是當年全盛時宮草細分乘輦道

林花深隱泛舟池
瑤臺仙去塵生海
甲帳神來風滿旗
好在畫圖畱勝蹟
五雲長護鶴笙祠

廣陵有寄瑤花詩丐余次韻

未信人間日易斜
攜春來問列仙家
情知后土無雙樹
迷殺江都是此花
芍藥謾吟紅繭栗
瑤兒從盼玉蘭芽
一壺闕樊川老醉寫烏絲
側帽紗

自笑

自笑推顏如病鶴
羽衣仍復會婆娑
已栽斑竹將扶老

夏翦蟠枝作養和驟雨欲來移蟻穴落花多罷分蜂窠

裏頭闕

春官老不道丘園自一科

唐有高蹈丘園
逋倫屠釣等科

送朱伯賢茂才之金陵

句容山邑長官清此日況逢賢友生
桉牘勞人煩慰藉風塵為客話經行
寬裁白苧游蕭寺近覓青驄過冶城
能賦鍾英懷古昔一時驄馬盡知名

題陳琳摹董源漁樂圖

小筆誰臨北苑圖蘭亭玉枕最難模
連峰秀樹

闕

闕

荒雲遠欲無，泊向小孤緣。
愛石望從青，草別名湖。
如相借，暫卸南風十幅蒲。

孤山即事

笑撫湖山迹，易陳先賢祠。
宇一番新玉，魚蔓草多無主。
白鵠秋天迴，有神曲港穿。
衝花外騎赤闌，扶約水邊人。
岡頭闕，枯梅枿獨是先生肺腑親。

素華臺

素華臺榭壓崑丘，況近仙家十二樓。
白裏深蟠龍虎氣，

空中遙接鳳凰游，瑤璃研水偏盛月。
雲母屏風不隔秋，姑射山中有冰雪神人。
願與國同休。

六月六日步過白蓮峰，眠食盡日而回。

漚漚堦除走暗泉，入厨新溜動厨煙。
蚤來燕坐齋中飯，夢在山光寺裏眠。
石脚儘盤千个竹，樹頭未動一聲蟬。
此中長日誰為伴，海岳菴詩在枕邊。

猿臂笛

三峽家山已隔生，一枝玉骨尚堪橫。
攀援遠似穿雲曲。

吟嘯高于噴竹聲
栗葉霜黃天竺夢
梅花春老玉關情
伶倫且為相娛樂
誰問將軍善射名

夏商隱還京師

扈蹕行營三十載
王門不肯曳長裾
閒從角里先生飲
與說圯橋父老書
花外飛丸紅叱撥
月中采藥玉蟾蜍
殘骸尚有刀圭分
會向南山訪敝廬

和率性大滌十詠

錄六

雲根石

石色斑斑野鹿胎石身渾裹夜明苔直將瑞氣穿龍洞
不比游塵汙馬嵬巖下松枝同不朽月中鶴駕合頻來
君看怪石英雄坐寂莫于今臥草萊

龍洞

怪石蜿蜒驅不動自從開闢鎮乾坤雨聲多在南山殷
雲氣都令白晝昏百尺潛蚪窺海眼一杯流水浸松根
有時急關天符下故遣靈人夜叩閤

鳳洞

第幾峯前蒼玉洞何年于此鳳求凰
梧枝宿久毛皆變竹實餐多髓亦香
露溼紫苔春似錦月明丹穴夜生光
我亦鷄行舊儔侶雲中有路共回翔

翠蛟亭

誰見蒼龍劈石開此峯元自勝飛來
闌干截斷山頭雨巖巖翻將地底雷
寒甚祇疑雲是雪霜餘每恨葉成堆
坡仙獨對無言說慚愧搜詩日幾回

丹泉

涵渟萬象一泓中欲探靈源未易窮丹窖久埋泉眼赤
珊瑚長浸石頭紅評來水味羞揚子收拾砂牀贈葛洪
一醉流霞三萬日年年分給羽人宮

天柱峯

此峯屹立浩無前信是人間別有天銅柱何煩天北際
蓬山寧在海東邊采樵巨弱多無骨擣藥靈禽或是仙
老我不能為狡獪峰頭看月幾回圓

祀五先生景行莫君為遨頭詩以記之

洛中諸老今誰識
飲少年高聽細論
百五日前花送雨
十三樓下水侵門
嶺霞栖向仇池穴
春鳥啼將蜀客魂
方外歸來羞禿鬢
也容鄉社割雞豚

金陵僧來聞笑隱住持事繁風雨有懷

憶曾共坐繙經石
語我松華壓酒方
一自宜城居輔國
幾時天竺話連牀
栖栖春草元桑楚
歷歷風鈴替戾岡
乞得江東今夕雨
與君聊洗夢中忙

後魏沙門法果為
輔國宜城子加侯

封蓋浮屠
爵秩之始

閏三月三日北山看花不與盟

應笑黃花厄閏時後三仍復負芳期老無劉几簪花分
閒有陶潛止酒詩穀雨林中先紫筍鬱罡山口足黃鸝
韓湘自倩奴星去袖得瑤臺第一枝

形影

形影胡為樂此畱山川映發思綢繆歌長杯酒毋多酌
世短何人第一流弟子受經猶北面樵青分屋自西頭
下方誤識金銀氣直倚崆峒一劍秋

古意

吳綾光纚纚織成鯨掉尾美人不敢裁恐觸波浪起

夜思

空山嘈夜雨幽人坐惆悵今夕楚澗泉明日秦淮浪

奚官洗馬圖

曾侍赤墀東天池看浴龍晚涼湖上夢猶立柳陰中

玄洲唱和

并序

錄二

茅山玄洲精舍左右真仙古蹟曰茵山羅姑洞霞

架海鶴臺桐華源玄洲精舍紫軒火浣壇隱居松
玉像龕至治二年壬戌歲道吳興溪上與松雪學
士倡和十絕以記其處仍書刻石以為山中故事

羅姑洞

事見
真誥

九疑得道女受事易遷家詩贈金條脫人逢夢綠華
鶴臺

靜夜颯靈風神君語帳中至今雙白鵠時下五雲峰

王若水梨花山鵲

山鵲語查查驚飛白雪花清明人載酒寒食客思家

芍藥白兔圖

妥帖紅雲朶迷離玉兔兒揚州行樂地惆悵鬢成絲

煙梅睡雀墨戲

珍偶偏憐瓊樹寒香漠漠紛紛誰見羅浮月黑一枝同
夢梨雲

絕句

二山環合一水中有老木參天不著幽人草閣誰收無

限雲煙

湖州竹枝詞

臨湖門外吳儂家
郎若閒時來喫茶
黃土築牆茅蓋屋
門前一樹紫荊花

西湖竹枝詞

光堯內禪罷言兵
幾番御舟湖上行
東家鄰舍宋大嫂
就船猶得進魚羹

臘盡

小雪初晴臘盡時無窮梅柳怨開遲人間不覺春來早
只有吾家布被知

山中客夜

鞍馬南州五日程豈知物外有茅亭塵埃暑困人如醉
月露夜涼天亦醒

元統元年冬十一月句曲外史菡山巢居成製
十小詩以自見錄呈華陽隱居資一捧腹

錄四

望見飛檐松杪花下盤陰洞石聲牙老樵迷路疑

一作驚

相問若箇江東道士家

谷中僅僅

一作有

一巷住壇上累累白

一作唯餘數

石陳杖隨

流水過鄰舍席與長松分主賓

但倚茅君為座主從稱外史作官街道家六經發願寫

深向石頭藏一函

屋壁

一作頭

置書碑版多雄白

一作

虹光怪鳳凰阿

玄洲地名

看

到空

一作深

山十日雪竈突無煙奈爾何

松下淵明為鄭明德作

歸來不為督郵輕，自為松根長茯苓。
博浪金椎拈不起，倚鋤却讀相牛經。

次韻荅薩天錫見寄

推敲指點據吟鞍，苦為搜詩夢不安。
誰會鳳凰臺上意，

手按黃菊看鍾山。

外史詩又載臺掾薩天錫求識予面而之燕南八月十四夜風雨宿茵閣

絕句七首明日追送之其一首云巡官畏虎威前呵驚動燕山薩照磨翦燭對牀詩未穩從渠醉尉問誰問又云內臺最近燕南幕博士臺郎有此除山澤何當大人賦寄聲多謝馬相如與此詩同是天錫在南臺時所作

凌波仙

春雲如水碧粼粼誰見凌波韞上塵
洛浦湘皋都是夢
手中花是卷中人

仲穆墨蘭

滋蘭九畹空多種何似墨池三兩花
近日國香零落盡

王孫芳草徧天涯

葉靜齋草木子云趙仲穆者子昂學士之子宋秀王之後裔也能作蘭木

竹石有道士張伯雨題其墨蘭詩云云仲穆見而媿之遂不復作

偶成

黃篋樓中枕書臥雙鶴交鳴驚夢破
青天墜下白雲來

卷簾一陣楊花過

墨海棠

漢宮愁絕冷裊枝

一作煙枝

一蘸劉郎兩鬢絲
甲帳夜寒銀

燭冷六銖雲帔獨來時

東坡書蔡君謨夢中絕句二放營妓絕句三虞

伯生題四絕于後真蹟藏義興王子明家要予

次韻凡九首

日將公事湖中了
醉入重城列炬明
自古大藩財賦地

古人偏得賦閒情

謝女嬌吟雪比鹽北臺馬耳見雙尖衲衣政索歌姬笑
不道春寒繡被添

寫韻軒中塵不驚與誰同躡鳳凰翎綵鸞可惜情緣重
只合清齋寫道經

釵頭新綠荔枝紅那與江桃色味同聞道端明新進譜
一時殿閣起薰風

香辟春寒玉辟塵流蘇斗帳醉和春一雙明月都無價

寂莫人間第一人

江南在處煙波好浪跡先生不上船近就闔閭城下宿
可憐霜月夜娟娟

青城樵者一衰翁寫罷烏絲滿袖風消得玉堂金硯匣
至今傳入畫圖中

初碾龍團怯醉魂分茶故事與誰論纖纖玉腕親曾見
祇有春衫舊酒痕

白公種竹蘇公柳談笑功名後世誇依舊封雲三萬丈

欽定四庫全書

元詩選初集
卷六十六

里

斷橋誰與築隄沙

山中

一枝石瘦如磨角六出花開似麝臍隨意莓苔一杯酒
也勝騎馬聽朝雞

桂枝詞

桂樹叢生枝婀娜糝粟黃雲欲成朵薰醒秋衣嬾下牀
金蟾啣斷燒香鎖

馬遠小景二首

桺未藏鴉雪未消春衫遊子馬蹏騎去年沽酒樓前路
錯認桃花第一橋

玉砂卷海白模糊千樹梅花埽地無仿佛水仙祠下路
金枝翠帶不勝扶

緝熙殿御製墨梅詩帖

宣和妙賞縞衣句傳在夷門作勝談行殿春風四十載
玉妃終老向江南

樓居春曉望玄圃

時寓杭州開元宮

欽定四庫全書

元詩選初集
卷六十六

里

子晉新宮倚太霞繞湖煙火萬人家觀臺一面無人處
日出煙銷都是花

遵道竹枝

簣簞谷口白雲生雲裏琅玕萬玉聲驚破幽人春枕夢
一窗斜月半梢橫

避暑圖

雪藕冰盤斫鱸厨波光簾影帶風蒲蒼生病渴無人問
赤日黃埃盡畏途

修竹士女圖

空谷佳人玉珮璫琅玕斜搭領襟長杜陵野老多才思
解道風吹細細香

題鶴亭所藏馬圖

九霄天馬俱龍種四十萬蹄雲錦斑一自漁陽鼙鼓後
不知幾箇到驪山

吳興道中二首

眠溪大樹不見日牧鷺小兒兼釣魚南風相送玉河口

舟子飯時吾讀書

扁舟偶趁采樵風
題扇書裘莫惱公
何處人間無六月
碧瀾堂上雨聲中

明德游仙詞十首用天柱山傳來依韻繼作雲
林道氣者觀之亦足自拔于埃壒矣

丙戌四月廿日

白玉之盤滄海東
蒼蒼下視遠如空
請看端正山河影
不滿坳堂杯中

鴻寶枕函雲積疊
芝臺鑪火暖氤氲
子能試喫青精飯

我亦聊書白練裘

夜久扶桑海色分
珠宮望拜赤龍君
洞庭未省君山在
元是昆侖一朵雲

藤蘿石上尋長跡
金粟圖中見小身
抖擻幾重衣袂看
情知不是散花人

龐見霓裳舞廣庭
罷看三十九章經
道人腰著金鴉觔
自向松根洗茯苓

右股清池足漚麻
池中肥水是松花
早知魏帝一九藥

宵信東門五色瓜

恥作深山服食仙
伐毛洗髓故依然
木蘭墜露研朱寫
只寫南華秋水篇

脚底琴生三尺鯉
袖中阿母一雙桃
別時身動凌波鞵
爛月如銀照夜濤

眼中自小薄蓬瀛
日日雙飛下始青
淨几明窗塵彷彿
定知草創大丹成

玉格金科自有期
赤城何待遠尋師
壁校也解為龍去

樵斧如何只看棋

聽琴圖

裊煙石壁對孤桐與和長松瑟瑟風不為野夫清兩耳
為君畱目送飛鴻

史局先生示以李境

闕

贈行卷輒題一絕卷

錦

丁亥

校書苦借青藜杖下馬笑拈金屈卮好是淮南師弟子
錢唐相見落花時

三香圖

凌波仙子塵生鞢空谷佳人玉鍊容不奈天寒風露早
日高猶傍錦熏籠

絕句

白足過橋三峽雪蒼頭吹笛滿林風狂花也有凌霄意
飛上松顛爛漫紅

題理妝士女

誰見新妝出繡幃辛夷花下六銖衣莫教蜂蝶知踪跡

閒與鄰娃鬪草歸

玄覽堂絕句

簾櫳低亞小梅枝
快雪時晴滿綠池
鈴索不搖鸚鵡睡
客來假寐亦多時

題張溪雲畫鉤勒竹

為愛風篁手自摹
不煩把燭倩官奴
須當白戰簣簞谷
羞殺江南沒骨圖

金人出獵圖

小隊鳴笳曉出圍地椒狼籍獸應肥上皇久厭猩羊粉
故遣蕭郎擊豕歸

靈巖寺

我欲搜林覓硯材誰將奇石半畝栽
胃中故有涵空閣好借君王辟暑來

次韻懷友

秋衣零落補紉多翦盡西興半畝荷
寒到故人殊未到不消湖上雁來過

春菜

土甲離離宿雨痕
畦蔬小摘當盤飧
紅綾餅餤殘牙齒
合向巖頭嚼菜根

春藥

紫甲紅牙玉滿闌
時分花雨潤斑斑
茯苓乍可來歸籠
遠志從來不出山

登善精舍葺治苟完七小詩以寫予懷

錄四

故山破屋誰來補
辛苦經營拾燕泥
幾樹桃花相送老

不消更著子規啼

澗中采石重鋪徑坡上移花小築墩深結雲嵐為保障
賸培松竹當兒孫

梓柳都移五十栽稚松千箇綠培總旁人莫笑千年計
萬一他時化鶴來

玉鉤橋水如凝碧才過牀頭寫瀑雷恰是東風太薄劣
逆流花片出牆來

雲林畫

望見龍山第一峯一峯一面水如弓水邊亭子無人到
猶有前時躡屐踪

李商隱學仙

誰云有分不關情淪謫千年為底名
消得權兒羊浣布詩中唯數玉溪生

京師荅薛玄卿

重重城闕亂煙花只擬將身乞酒家
試聽御溝冰下水與君持底駐年華

三衢道中三首

大溪中道放船流
船壓山光瀉碧油
三百里灘欹枕過
買魚醺酒下嚴州

東風惡劇雨飛花被底春
寒水漲沙蘭茝溪香小
回首一峯晴雪是金華

界道飛流山翠重
杜鵑無語杜鵑紅
歸人一舸貪新水
渾墮丹青僂面中

燈花聯句

并序

永嘉李季和自金陵持趙涼公書來累宿菌閣下
十月三日夜天始霜殊寒兩燈並作花遂聯句于

酒間

星閣迎寒悶霜鐘動夜擬

孝

酒深燔木火漏下續蘭缸

寸草熒芝小

雨

丹葩瑞帶雙金枝交婉孌

孝

銀粟亂鬢

鬟螭結飛蛾笑

雨

膏融吐鳳雙汞珠光透鏡

孝

火齊幻

岳幢的的輝青瑣

雨

淫淫颭玉缸燭龍擎紫蓋

孝

翹燕

綴紅雙鄰眼書窺隙

雨

仙眉墨暈窗狂吟心葉發

孝

喜

聽足音楚折墜

見管子

風吹座

雨

鉤簾月墮江青藜如見

遇揮手出紛厖

孝光

神光樓與鄭明德聯句

藏書地肺穴歸巢湖領山秋清蒹葭露

祐

水落芙蓉灣

蟲飛燭見跋

雨

鶴唳棚上擐桂藜豈克隱

祐

草間斯投

閒脫幘鬚俱禿

雨

哦詩意殊慳驚颺攪墜葉

祐

疏櫺裊

藜藿爐溫夕熏罷

雨

汀寒夜舟還瀛嶼倚突兀

祐

海圖

挂瀾編熊經諒方煦

雨

豹隱知難攀遙聞城門柝

祐

却

撫刀頭環濡毫漑蟾滴

雨

拄頰揮魚頰

祐

倚牆童髡熟

雨

覆杯酒腸孱神光出葭莢

祐

澄懷斬茅管氣存驗當

宁

雨

道充甘抱關腥腐孰不死

祐

伐洗我獨頑仙從琴

心舞

雨

聖視鼎胙攷

黎明官祭和靖祠

出處匪異致

祐

躁靜難

同班淵宅鑑鼃氣

雨

天游滌神奸緬昔郿塢築

祐

餘此

巾裯殷

雨

併乏麥飯饗

祐

益重黎毗瘰兩彈聞鵲血

雨

重洒化鶴潜窮閭劫灰聚

祐

故國亡詩刪於焉遁葛井

雨

豈徒慕商顏茹芝腹能實

祐

飲菊安逾嫺披雲陟矸

磯

雨

臨池漱潺湲神鯉破網出

祐

乳狸據裊跼

雨

煙際

擘畫鷁

祐

掌中餽白鷗去鄉吳音鶻

雨

支頤越吟艱一

世憂聚散

祐

多岐重憂患睽違隔風雨

雨

空聞珮珊珊

祐

集太白語酬僧淨月

主人碧巖裏為余話幽栖真訣自從茅氏得風流還與
遠公齊滿堂空翠如何埽而君解來一何好白玉麈尾
談重玄琉璃硯水常枯槁蒼蒼雲松拂彼白石世人聞

此皆掉頭就中與君心莫逆袖拂紫烟去空中聞天雞

借問蘇耽鶴早晚向江西

鐵崖先生跋曰予觀貞居子集句詩政如冶城銅像捧額

珠蓮座于長千也可寶可玩太白見之當曰吾錦千萬機衣被天下詩人烏得割截如此貞居子其慎取之哉勿俾責償也會稽楊維禎跋

集王摩詰書語六言二首


寒犬吠聲如豹夜春相應疎鐘華子岡頭清月照人獨坐山中

夜深僮僕靜默月明輞水淪漣獨與山僧飯訖寒林遠

火初然

元詩選初集卷六十六

謹案第十六頁前二行紐掄舊作紐憐今改二
十三頁後五行實喇卜舊作沙刺班今改



總校官候補中書臣吳紹潔
校對官編修臣馬啟泰
謄錄監生臣徐騰